

## Gsellschaftsspiele aus der Großmädl-Zeit

Schuhwix: eener is ausgewählt gin, der hat die anre der Reih noh was gfroot. Un immer hat mer antworte misse: Schuhwix. Wer bei der Antwort gelacht hat, der hat e Pfand abgin misse. Un wann vill Pfande zammkumm ware, sin die geger e Strof wieder zruck verteelt gin. Die Strof war immer etwas Ausfallenes: eem Bu e Bussl gin, Strick hupse, bis an de Eck vun der Gass un zruck laafe, Hupsschul springe, in der Nacht de Sodawassermann ufstawwre, beim Pharrebatschi ans Finschter kloppe....

Stuhl ricke: zwaa Stiehl sin mit der Lahn gegenaner hingstellt gin, e Bu un e Mädl han sich mitm Buckl gegenaner drufgsitzt un e Dritter hat haptak gstann un wann er geplätscht hat, han die zwaa sich rechts oder links drehe misse. Wanns geklappt hat, dass sich alli zwaa rechts gedreht han, han se sich e Bussl gin derfe.

Flasche drehe: alli han im Kreis gsitzt un eener hat e leeri Literflasch in der Mitt gedreht. Der, geger de die Flaschespitz stehn geblieb is, hat em Dreher e Bussl gin un hat selwer weiter die Flasch gedreht.

## Es Licht war schuld

Anfangs Mai hat sich die Bäsl Mariann selwer nimi ausstehn kenne. Ihre Hoor ware iwer Winter stark gewaxt, die Zottle han er schon bal die Aue verdeckt un sie hat sich vorghol, zum Friseer zu gehn. Wie se dann dorte ufm Stuhl ghuckt hat, ment die Friseerin, es wär doch scheen, wann se de grooe Hoor ach bissl Farb gin tät. Un hat e dunkelblondi vorgschlaa. Die Bäsl Mariann war inverstann un wie se noh stundelangem Hin un Her in de Spiegel gschaut hat, is se sich arich scheen un um villes jinger vorkumm.

Derhem ankumm hat se zu hantiere anfang, dass es Mittachesse pinktlich ufm Tisch stehn soll. Un schon war de Vetter Matz do, sie han sich an de Tisch gsitzt, er hat sich zwaamol Supp rausgscheppt un ach beim zweite Gang gut ninghau. Jetz fangt die Bäsl Mariann an zawwlich zu gin un denkt: Meiner Seel, gsieht der dann nit, dass ich frisiert un gfärbt sin? Sie schuckt sogar phaarmol de Kopp iwer die Schiller, um sich quasi wichtich zu mache. Sie denkt weiter: Sapperlott nochmol! Sin ich meim Mann so gleichgiltich? Oder is es em ennerlei un wurscht, wie ich ausschau? Drum froot se ufmol: „Matz, gsiehscht dann nix?“ Der froot nor: „Mariann, hascht der neiji Schuh kaaft?“

Jetz war dem Weib sei Geduld am End un es hat zu wettre anfang: „Bischt oder werscht bleblem? Mir han e halwi Stund mitnaner am Tisch ghuckt un du hascht nit gsiehn, dass ich e neij Frisur han?“ „Ich han mer jo gedenkt, dass was annerscht is“, ment de Matz druf, „un hättst du es Licht angebrennt, hätt ich de Wechsel mit Sicherheit bemerkt!“